

摘藻堂四庫全書薈要

集部

欽定四庫全書薈要

集部

漢魏六朝百三家集卷一百四



詳校官候選知縣臣吳甸華

欽定四庫全書薈要卷一萬九千六百九十七 集部

漢魏六朝百三家集卷一百四

明 張溥 輯

沈炯集  
賦

歸魂賦

古語稱遊魂升極周易有歸魂卦屈原著招魂篇故知  
魂之可歸其日已久余自長安反乃作歸魂賦其辭曰

伊吾人之陋宗資立聖而云始肇邵閔之靈源分文武  
之世祀實聞之乎家記又乎之於惇史允宗貴而博古  
四史成乎一身怪日月之遼遠而承襲之相因豈少賤  
之能察非末學之知津也若夫風流退讓在秦作相越  
江以東惟戎及鄴出忠出孝且卿且公世歷十五爰逮  
余躬值天地之幅裂遭日月之霧虹去父母之邦國埋  
形影於胡戎絕君臣而辭骨肉躋厚地而跼蒼穹抱北  
嘶之胡馬望南飛之夕鴻泣霑襟而雜露悲微吟而帶

風昔休明之云始余播棄於天地自太學而遊承明出  
書生而從下吏身豫封禪之官名入南宮之記登玉墀  
之深眇出金門之崇邃受北狄之奉書禮東夷之獻使  
闕實不嘗至屈膝遜言以殊方降意嗟五十之踰年忽  
流離於凶忒值中軍之失權而大盜之移國何赤疹之  
四起豈黃霧之云塞祈瘦弟於赤眉乞老親於劇賊免  
伏質以解衣遂窘身而就勒既而天道禍淫否終斯泰  
靈聖奮發風雲響會掃欃槍之星斬蚩尤之旆余叛逆

而効從遂妻誅而子害雖分珪而胙土迄長河之如帶

肌膚之痛何泯潛翳之悲無狀我國家之沸騰我天下

之匡復我何辜於上玄我何負於鄰睦背盟書而我欺

圖信神而我戮彼孟冬之云季總官司而就紲託馬首

之西暮隨檻車而迴轍履峨峨之層冰面颼颼之巖雪

去莫敖之所縊過臨江之軌折矧今古之悲涼竝攢心

而霑袂渡狹石之歌危跨清津之幽咽鳥虛弓而自隕

猿號子而腹裂厯沔漢之逶迤及楚郡之參差望隆中

之大宅映峴首之沉碑既繆然而就鞅非造次之能窺至  
若高祖武皇帝之基天下也岐周景亳之地龜圖雀書  
之秘醒醉之歌味絕讓畔之田鱗次余既長於克民覺  
何從而掩泗洧水兮深且清宛水兮澄復明昔南陽之  
穰縣今百雉之都城我太宗之威武過宛洧而陳兵百  
萬之虜俄成魚鼈千仞之阜修似滄瀛雖德刑成於赦  
服故蠻狄震乎雄名乃尋浙而厯商遂經秦而至洛覺  
高蹈之清遠具風雲之倏爍其山也則欽岑靠嵬巖峻

婆陀或孤峰而秀聚或逸出而橫羅千歲之木坐嶺表  
百丈之石枕谿阿其水則砰訇滌汨或寬或疾擊萬瀨  
而相奔聚千流而同出何武關之狹隘而漢祖之英雄  
山萬里而仰雲霧水百仞而寫蜿蜒若一夫而守隘豈  
萬衆之能攻去青泥而踰白鹿越渥水而到青門長卿  
之賦可想邵平之迹不存咄嗟驪山之阜惆悵灞陵之  
園文恭儉而無隙羸發掘其何言訪軹道之長組拾藍  
田之璵璠無故老之可訊竝膺膺之空原登未央之北



闕望長樂之基趾伊太后之所居築旗亭而成市槐路  
鬱以三條方塗坦而九軌觀阡陌之遺蹤實不乖乎前  
史傍直城而北轉臨橫門而左趨南則董卓之塢北則  
苻堅所居即二賊之墟壘為彼主之庭除終南龍從太  
一嵯峨九竇掘起八壘連河汨涇泥之混濁灌渭渚之  
清波指咸陽而長望何趙李而經過息甘泉而避暑猶  
爽塏而清和爾乃背長夏涉素秋卧寒野坐林陬霜微  
凝而侵骨樹栽動而風遒思我親戚之顏貌寄夢寐而

魂求察故鄉之安否但望斗而觀牛稚子天於鄭谷勉  
勵愧乎延州聞愛妾之長叫引寒風而入楸何精靈以  
堪此乃縱酒以陶憂至誠可以感鬼秉信可以祈天何  
精隕而魄散忽魂歸而氣旋解龍驟而見送走郵驛於  
亭傳出向來之大道反初入之山川受繞朝之贈策報  
李陵之別篇淚未悲而自墮語未咽而無宣於時和風  
四起具物初榮草極野而舒翠花分叢而落英魚則潛  
波渙濯鳥則應嶺俱鳴隨六合之開朗與風雲而自輕

其所涉也州則二雍三荆昌歡江并唐安瀾洛巴郢雲  
平其水則淮江漢洧隨浩汗灑潦滙滴河涇渭相亂或  
浮深而揭淺或凌波而沿岸每日夕而靡依常一步而  
三歎蠻蠻之與荆吳玄狄之與羗胡言語之所不通嗜  
欲之所不同莫不疊足斂手低首曲躬豈論生平與意  
氣止望首丘於南風悲城邑之毀撤熹風水之渺揚既  
盡地而謁帝乃懷橘而升堂何神僊之足學此即雲衣  
而虹裳也

幽庭賦

矧幽庭之閒趣具春物之芳華轉洞房而引景偃飛閣  
而歲霞築山川於戶牖帶林苑於東家草纖纖而垂綠  
樹搔搔而落花於是秦人清歌趙女鼓筑嗟光景之遲  
暮詠羣飛之棲宿顧留情於君子豈含姿於嬌淑於是  
起而長謠曰故年花落今復新年一故成故人那得  
長繩繫落日年年月月但如春

表

為王僧辯勸進梁元帝初表

衆軍薄伐塗次九水即日獲臨城縣使人報稱侯景弑  
逆皇帝賊害太子宗室在寇庭者竝罹禍酷六軍慟哭  
三辰改曜哀我皇極四海崩心我大梁纂堯構緒基商  
啓祚太祖文皇帝徇齊作聖肇有六州高祖武皇帝聰  
明神武奄龕天下依日月而和四時履至尊而制六合  
麗正居貞大橫固祉四葉相係三聖同基蠢爾凶渠遂  
馮天邑閭闔受白登之辱象魏致堯城之疑雲宸承華

一朝俱酷金楨玉幹莫不同寃悠悠彼蒼何其罔極臣  
聞喪君有君春秋之茂典以德以長先王之通訓少康  
則牧衆撫職祀夏所以配天平王則居正東遷宗周所  
以卜世漢光以能捕不道故景厯重昌中宗以不違羣  
議故江東可立儔今考古更無二謀伏惟陛下至孝通  
幽英武靈斷當七九之厄而應千載之期啓殷憂之明  
而居百王之會取威定霸殄阻艱難建社治兵載循古  
道家國之事一至於斯天祚大梁必將有主軒轅得姓

存者二人高祖五王代實居長乘屈完而陳諸侯拜子  
武而服大輅功齊九有道濟生民非奉聖明誰嗣下武  
臣聞日月貞明太陽不可以闕照天地貞觀乾道不可  
以久惕黃屋左纛本為億兆而尊鸞輅龍章蓋以郊禋  
而貴寶器存乎至重介石慎於易差黔首豈可少選無  
君宗祏豈可一日無主伏願陛下掃地升中柴天改物  
事迫凶危運鍾擾攘蓋不勞宗正奉詔博士擇時南面  
即可居尊西向無所讓德四方既知有奉八百始可同

期殘寇潛居器藏社處乾象既傾坤儀已覆斬莽輓車  
燒卓照市廓清函夏正為瑩陵開雪宮闡庶存鐘鼎彼  
黍離離伊何可言陛下繼明闡祚即宮舊楚左廟右社  
之制可以權宜五禮六樂之容歲時取備金芝九莖瓊  
茅三脊要衛率職尉候相望坐廟堂以朝四夷登靈臺  
而望雲物禪梁甫而封泰山臨東濱而禮日觀然後與  
三事大夫更謀都鄙左瀍右澗夾雒可以為居抗殿疏  
龍惟王可以在鎬何必勤勤建業也哉臣等不勝控款



之至謹拜表以聞

勸進梁元帝第二表

紫宸曠位赤縣無主百靈聳動萬國回皇雖醉醒相扶  
同歸景亳式歌且誦總赴唐郊猶懼陛下俛首潜然讓  
德不嗣傳車在道方慎宋昌之謀法駕已陳尚杜耿純  
之勸岳牧翹首天民累息臣聞星回日薄擊雷鞭電者  
之謂天岳立川流吐霧蒸雲者之謂地苞天地之混成  
洞陰陽之不測而以財成萬物者其在聖人乎故云天

地之大德曰生聖人之大寶曰位黃屋廟堂之下本非  
獲已而居明鏡四衢之罇蓋由應物取訓伏惟陛下稽  
古文思英雄特達比以周旦則文王之子方之放勛則  
帝摯之季千年旦暮可不在斯庭闕湮亡鐘鼎淪覆嗣  
膺景厯非陛下而誰豈可使赤舂更立盆子隗囂託置  
高廟陛下方復從容高讓用執謙光展其矯行偽書誣  
罔正朔見機而作斷可識矣匪疑何卜無待著龜日者  
公卿失馭禍纏霄極獯羯憑陵姦臣互起率戎伐穎無

處不然勸明誅晉側足皆爾刁斗夜鳴烽火相照中朝  
人士相顧銜悲涼州義徒東望隕涕慄慄黔首將欲安  
歸陛下英略緯天沉明內斷橫劔泣血枕戈嘗膽農山  
圯下之策金匱玉鼎之謀莫不定算宸帷決勝千里擊  
靈鼉之鼓而建翠華之旗驅六州之兵而總九伯之伐  
四方雖虞一戰以霸斬其鯨鯢既章大戮何校滅耳莫  
非姦回史不絕書府無虛月自洞庭安波彭蠡底定文  
昭武穆芳若椒蘭敵國降城和如親戚九服同謀百道

俱進國耻家怨計期就雪社稷不墜繫在聖明今也何  
時而申帝啓之避凶危若此方陳泰伯之辭國有具臣  
誰敢奉詔天下者高祖之天下陛下者萬國之歡心萬  
國豈可無君高祖豈可廢祀即日五星夜聚八風通吹  
雲煙紛郁日月光華百官象物而動軍政不戒而備飛  
艦巨艦竟水浮川鐵馬銀鞍陵山跨谷英傑接踵忠勇  
相顧湛宗族以酬恩焚妻子以報主莫不覆楯銜威提  
斧擊衆風飛電耀志滅凶醜所待陛下昭告后土虔奉

上帝廣發明詔師出以名五行夕返六軍曉進便當盡  
司寇之威窮蚩尤之伐執石趙而求璽斬姚秦而取鐘  
脩掃瑩陵奉近宗廟陛下豈得不仰存國計俯從民請  
漢宣嗣位之後即遣蒲類之軍光武登極既竟始有長  
安之捷由此言之不無前准臣等或世受朝恩或身荷  
重遇同休等戚自國刑家苟有腹心敢以死奪不任悽  
悽之至謹重奉表以聞

勸進梁元帝第三表

衆軍以今月戊子總集建康賊景烏伏獸窮頻擊頻挫  
姦竭詐盡深溝自固臣等分勒武旅百道同趨突騎短  
兵犀函鐵楯結隊千羣持戟百萬止紂七步圍項三重  
轟然大潰羣凶四滅京師少長俱稱萬歲長安酒食於  
此價高九縣雲開六合清明矧伊黔首誰不載躍伏惟  
陛下咀痛茹哀嬰憤忍酷自紫庭絳闕胡塵四起孺垣  
好時冀馬雲屯泣血臨兵嘗膽誓衆而吳楚一家方與  
七國俱反管蔡流言又以三監作亂西涼義衆阻秦塞

而不通并州遺民跨飛狐而見絕豺狼當路非止一人  
鯨鯢不梟倏焉五載英武克振怨恥並雪永尋霜露伊  
何可勝臣等輒依故實奉脩社廟使者持節分告園陵  
嗣后升遐龍輜未殯承華掩曜梓宮莫測竝即隨由備  
辦禮具凶荒四海同哀六軍袒哭聖情孝友理當感慟  
日者百司岳牧仰祈宸鑒以錫珪之功既歸有道當璧  
之禮允屬聖明而優詔謙沖宵然凝邈飛龍可躋而乾  
爻在四帝閣云斗而閭闔未開謳歌載馳是用翹首所

以越人固執熏丹穴以求君周民樂推踰岐山而事主  
漢王不即位無以貴功臣光武止蕭王豈謂紹宗廟黃  
帝迷於襄城尚訪御人之道放勛入於姑射猶使罇俎  
有歸伊此儻來豈聖人所欲帝王所應不獲已而然伏  
讀璽書尋諷制旨領懷物外未奉慈衷陛下日角龍顏  
之姿表於徇齊之日彤雲素靈之瑞基於應物之初博  
學則大哉無所與名深言則嗟乎文章之觀忠為令德  
孝實動天加以英威茂略雄圖武算指麾則丹浦不戰



顧眄則阪泉自蕩地維絕而重紐天柱傾而更植鑿河  
津於孟門百川復啓補穹儀以五石萬物再生縱陛下  
拂袵衣而遊廣成登弁山而去東土羣臣安得仰訴兆  
庶何所歸仁況郊祀配天壘篚禮曠齊宮清廟匏竹不  
陳仰望鸞輿匪朝伊夕瞻言法駕載渴且饑豈可久稽  
衆議有曠彝則舊邦凱復函谷已平高奴櫟陽宮館雖  
毀濁河清渭佳氣猶存臯門有亢甘泉四敞土圭測景  
仙人承露斯蓋九州之赤縣六合之樞機博士捧圖書

而稍還太常定禮儀其已列豈得不揚清警而赴名都  
具玉鑿而旋正寢昔東周既遷鎬京遂其不復長安一  
亂邠洛永以為居夏后以萬國朝諸侯文王以六州匡  
天下方之跡基百里劔杖三尺以殘楚之地抗拒六戎  
一旅之卒翦夷三叛坦然大定御辯東歸解五牛於冀  
州秣六馬於譙郡緬求前古其可得歟對揚天命無所  
讓德有理存焉敢重祈奏

為百官勸進陳武帝表

臣聞春榮秋落四時所以迭代金行水流五德所以互  
序昔陶唐告終有虞氏作漢魏禪讓晉宋以之登庸夫  
有非常之功有非常之賞能利天下者受天下之利陛  
下造化之功日月之德褰裳去之物誰仰訴頃五星夜  
聚八風通吹豐露呈甘卿雲舒簇白狼遠至素雉朝飛  
天意顯然靈貺可覩

為陳太傅讓表

奏六代之舞不能祚天具百神之歌無以動聖延首當

閭轉增危慄百川沸騰百室如燬釋位同謀諸侯總至  
盟書會府餘臣一人若使幅巾衡巷口絕平吳朝遊赤  
松暮過濟北出就侯服入褫龍章則四郊有壘誰守社  
稷如其雄戟在前強弩自衛負孺子之圖飾緣鵲之鼎  
軍威重於護將國禮貴於寒門則臣道尚卑孰云非逼  
臣所以出謝公卿入訓妻子拜長陵之園謁太祖之廟  
不以九族違恩義不以百姓負國家所期陛下與北極  
同壽朝廷與南山同固

經通天臺奏漢武帝表

臣聞橋山雖掩鼎湖之竈可祠有魯遂荒大庭之跡無  
泯伏惟陛下降德猗蘭纂靈豐谷漢道既登神僊可望  
射之采於海浦禮日觀而稱功橫中流於汾河指栢梁  
而高宴何其樂也豈不然歟既而運屬上僊道窮晏駕  
甲帳珠簾一朝零落茂陵玉盃宛出人間陵雲故基共  
原田而膺膺別風餘趾帶陵阜而茫茫羈旅縲臣能不  
落淚昔承明既厭嚴助東歸駟馬可乘長卿西反恭聞

故實竊有愚心黍稷非馨敢望徼福但雀臺之弔空愴

魏君雍丘之祠未光夏后瞻仰煙霞伏增悽戀

藝文憲  
作靈甲

帳作翠幕宛出作遂出別風作  
扶風既厭作見罷煙霞作徽猷

### 陳情表

臣嬰生不幸弱冠而孤母子零丁兄弟相長謹身為養  
仕不擇官承艱朝命偶在亂世冒危履險自死輕生妻  
息誅夷昆季屠滅餘臣母子得逢興運臣母妾劉今年  
八十有一臣叔母妾丘七十有五私門弟姪故自無人

妾丘兒孫又久亡泯兩家侍養餘臣一人前帝知臣之  
孤煢眷臣以州里不欲使頓居草萊又復矜臣溫清所  
以一年之內再三休沐臣之屢披丹款頻冒宸鑒非欲  
苟違朝廷遠離畿輦一者以年將六十湯火居心每跪  
讀家書前懼後喜溫枕扇席無復成童二者職居彛憲  
邦之司直若自虧身禮何問國章前德綢繆始許哀放  
內侍近臣多悉此旨正以選賢與能廣求明哲超超在  
苒未始取才而上玄降戾奄至今日德音在耳墳土遽

乾悠悠昊天哀此罔極兼臣私心煎切彌迫近時悽悽  
之祈轉忘塵觸伏惟陛下睿哲聰明嗣興下武刑於四  
海弘此孝治寸管求天仰歸惟宸有感必應實望聖明  
特乞霈然申其私禮則王者之德覃及無方矧彼翔沈  
孰非涵養云云

為周弘正讓太常表

臣聞玉鳥雕楹不取材於蠮木丹朱繡黼豈襲冕於蘿  
薜何則適用各有所宜朝野不可一旨叔孫之分定禮



儀倍資典實刁協之躬為唱引豈易其儀賓主闕對封  
禪失儀責以司存云誰之咎况南史執簡轉見違才君  
舉必書尤難妄冒

為周儀同失律後復官表

日者駭驚鄭馬害在晉軍獄囚悲其夜數縲人切其曉  
奏危光似燭察命如絲云誰之尤自貽其咎假令誅以  
妻子戮及墳墓漢非負德陵實孤恩况伏鎖俛首遂受  
淮陰之間吞聲飲恨不與臧洪共死陛下憐而宥之伊

臣豈不獨愧喪其子弟六謝父兄百萬之師千夫有長  
問臣安在誰曰董司魂遊奉高不知何對

啓

為王僧辯答貞陽侯啓

席威卿反命具有奉答馬嵩仁至又奉去月二十八日  
誨增用傾悚秦為不道西都失守率土臣妾莫不驚惶  
喪君有君實惟典禮繼世嗣歷明於通誥所以百辟羣  
司四方岳牧共立大計僉議所歸故紹晉安殿下用傳

寶祚樹立之宜無由遠謀鄰國足下宗枝蕃戚德譽早  
隆既身限北庭事隔匡贊今者借助齊主揚旆南轅但  
嗣守洪基即既其主若阿衡帝載誠所推揖弘佐中興  
誰曰不可所望齊朝永存信誓謹當命北舟人奉迎麾  
駕無容進枉齊兵遠於江表仰冀弼諧時政用極奮庸  
但江東之地數千餘里民附國險水陸衿帶若舊京從  
命揚徐承旨又恐西南之地二十餘州不即威懷容為  
齊國之患而糧裹之宜更遲動靜祇展之日冀在一二

謹因馬嵩仁并遣貞威將軍通直郎散騎常侍馬瑱口  
宣詔述

為王僧辯重答貞陽侯啓

席威卿至奉今月五日誨披函伸紙號耻交哀天未悔禍  
地維重絕九縣沸騰四海悲憤嗣主欽明濬哲齊聖廣淵  
體自宸極受命文祖主梁祀者非此而誰且年倍漢昭弗  
明上官之詐德踰姬誦彌昭周旦之誠今海內衣冠中朝  
卿士或南陽舊隸官成天監之初代邸故臣榮光承聖之

始莫不人竭其力爭求效命輸心嗣主以報先帝之恩今  
荆陝淪覆正是江北數縣即東南藩翰萬里而遙主甲治  
兵軸艫相接長波天限方漢城池修德綏民中興可待孤子  
本以庸懦加復窮喘且平生素蓄志不在位世蒙朝寵身實  
許國武皇擢之千里先主申其三顧因此踰濫遂居端右  
屬天步艱難寄深憂積方欲詢於髦傑採之輿皂同康時  
務共贊皇猷一彼車書刷茲讐耻然後守其侯服歸老赤  
松至如今日使須白事披奉來誨承彼送還今璣枝令戚

播越秦虜明公儻能入朝同獎王室伊呂之任僉曰仰歸  
寧不副茲仄席濟扶匡救若斯言不渝更聽後旨便遣鷁  
舟虹舸奉迎麾旆但閱來朝意在主盟今江東所奉彼屬  
披圖未蒙朝意鄭拒子忽左史是之漢背劉襄班書稱  
允況屬疎於昔彌不敢聞命謀期通識賜亮此誠

為王僧辯奉貞陽侯啓

自秦兵寇陝臣便營赴援纔及下船荆城陷沒即遣劉  
周入國具表丹誠左右勳豪初竝同契周既多時不還

人情疑阻比冊降中使復遣諸處詢謀物論參差未甚  
決定始得侯瑱信示西寇權景宣書令以真跡上呈觀  
視將帥恣欲同泰若一朝仰違大國臣不辭灰粉悲梁  
祚永絕中興伏願陛下使事濟江仰藉皇齊之威憑陛  
下至聖之略樹君以長雪報可期社稷再輝死且非宏  
請押別使曹沖馳表齊都續啓事以聞伏遲拜奉在促  
為王僧辯重奉貞陽侯啓

員外常侍姜嵩還奉勅伏具動止大齊仁義之風曲被

鄰國卹災救難申此大猷皇家枝戚莫不榮荷江東冠  
冕俱知憑賴今歆不忘信信實由衷謹遣臣第七息顯  
顯所生劉并弟子世珍往彼充質仍遣左民尚書周弘  
正至厯陽奉迎艫舳浮江俟一龍之渡清宮丹陛候六  
傳之入萬國傾心同榮晉文之反三善克宣方流宋昌  
之議國祚既隆社稷有奉則羣臣竭節報厚施於大齊  
戮力展愚效忠誠於陛下今遣吏部尚書王通奉啓以  
聞



書

答張種書

若乃三江五湖洞庭巨麗寫長洲之茂苑登九曲之層  
臺山高水深雲蒸霧吐其中之秀異者實虎丘之靈阜  
馬冬桂夏柏長蘿脩竹靈源祕洞轉側超絕遠澗深崖  
交羅戶穴

銘

太極殿銘

有序

臣聞在天成象紫宮所以昭著在地成形赤縣居其區  
宇太極殿者資兩儀之意焉大壯顯其全模土圭測其  
正影周曰路寢漢稱前殿雖名號參差其實一也主上  
未明求衣日旰忘食隳樂壞禮造次留神漢陞秦除莫  
不葺復而此殿興造累歲未成外邁戎機內憂民力劬  
勞深慮荏苒移時至陳永定六合既清五禮稍備雕楹  
玉鳥華棖壁璫揆之有日而猶一柱梗楠豫章地淪外  
寇楚材晉用非復我求既而新亭前江有流查甚壯盤

根錯節枝葉葱蒨津人以聞正堪時用於是將作受詔  
冬官奉職百工竝作屢降乘輿匠石磨龍必經天旨儉  
而不固泰而不奢億兆填填而樂成也曾未數旬煥然  
雲構昔晉朝繕造文杏有闕梅梁瑞至畫以標花自是  
迄今又獲神物即樟樹焉殿之某間即某柱是也銘曰  
軒轅狹堂夏后卑宮文來質往塞產彌崇體制八都開  
茲萬戶灼爍雄梁徘徊大廡壁月宵懸卿雲晝聚豈伊  
闔陽飛來應柱嘉辰令月新寢告成青槐赤棘郎將司

兵翠被負辰百辟公卿鐘鼓八佾簫韶九成庸臣再拜  
天子萬齡

碑

林屋館碑

夫玄之又玄處衆妙之極可乎不可成道行之致斯蓋  
寂寞宵冥希微恍惚故非淮南八僊之圖瀨鄉九井之  
記至若崑山平圃銀榜相暉蓬閣僊宮金臺崛起南瞰  
晉臺傍連飛閣桂柱星羅瓊軒雲構銘曰

大道既隱衆聖無門悠悠太極誰見玄根祈年立秦望  
仙表漢髣髴神靈依稀宮觀峨峨林屋輪奐徘徊庭羅  
花鳥室靜塵埃

太尉始興昭烈王碑

古者帝王之興莫不崇建親屏恭伯讓而退封武哀終  
而受號則有之矣至若勒功鼎鼐銘德太常清廟尊乎  
國家揚名顯乎子弟在昭烈王見之焉若夫媯水遙源  
石碣遐集五絲作而詠南風八世興而和鳴鳳籍帝王

之基居正卿之族有由來矣孔融汝穎之論許其少多  
傳暢諸公之書頗有賢哲自漢至魏涉江而東綿邈蟬  
聯言之者舊皇上革命應運大啓邦國麟趾磐石之宗  
宜固金楨玉幹之戚畢封文叔掩被之悲無泯仲謀援鞍  
之慟逾切乃封始興郡王永定元年下詔曰天倫所感  
義本因心名器追崇則惟恒典亡兄梁故南兗州刺史  
長城縣公德範沈邃風度寬厚性與天通深乎靡測昔  
彈冠入仕譽重城華宣力艱難遂顧洪業雖時非季漢

勢異桓王海內挹其風流生民懷其大德者矣朕受天明  
命爰膺寶曆言尋永往興慕增懷可奉贈太尉公昔之  
密戚近親宗英令德若河間之不羣沛獻之受象東平  
之樂善陳思之藻麗實聞之也未有身死忠貞名存前  
代若王之義烈者銘曰

稽古帝舜重瞳有裔曰陳祚土纂虞之系騰波汝潁承  
流媯汭四嶽有後六竒獻計惟寔惟忠卿長羣公浮舟  
震澤佳氣葱葱岐周七十商亳百里婉婉中陽帝出攸

止太常景皇季孫讓子天下不踐間之惇史入孝出忠  
清輝何已苞指周歲風流懿德言為世範行成士則名  
山可鐫豐碑易勒惜哉往矣殞身凶慝鼎命既遷山河  
是始光啓代郡德表永祀周以別功魯侯戾止禮茂廟  
堂恩加松祀

哀策文

陳武帝哀策文

望三靈而標目躋九地而崩心哭仍几之將撤慟祖鬻



之虛斟黃屋祲而白日掩紫極涵而浮雲陰其辭曰

悠悠媯水鬱鬱姚墟惟帝之系在唐作虞正卿之後握  
此靈符雕雲布族祥星結樞負茲大鏡未拾遺珠爰初  
發跡斬地鞠旅大定番禺載戡海渚承釁而運席卷中  
流王室如燬乃合諸侯負鐵誓衆釋位同謀俱登涿鹿  
實斷蚩尤道濟一匡功歸四履爰總百官訓於天子儻  
來有運事非獲已翠龜負字赤雀銜書謳歌適夏禮樂  
遷虞負辰正位升壇受圖二儀協序五緯同符門歌麟

趾室詠騶虞奉常定日太卜蠲時升中備物方告雍熙  
天甘玉露地秀金芝休禎未答靈貺徒欺吏求穆卜詔  
絕良鑿義躔失御天街褫蹕夏采升榮宮車晏出洞閨  
移凶充庭罷吉閑宵宵之窮燈去昭昭之遊日歸大暮  
之不暘降幽宮而長畢巫咸筮告容成戒期文衛如在  
葆鐸相悲去畢陌而東顧望橋山而路遲臣攀龍而尚  
在魂過沛而何之待低昂之靈燾奉寂寂之空帷銅雀  
沒於脩松平陵隱於深柏節鼓鼓之哀音燎燿火於通

夕薤露落而暮日寒玄霜凝而龍草白銘功德於旂常  
被徽音於鐘石迴天儀於清廟祔祖考而來格播茂實  
與英聲鬱氛氲於宗祏

祭文

祭梁吳郡袁府君文

夫宮鳴徵應響韻相趨桂馥蘭芬期臭在斯道合一朝  
豈忘千載日者明德世彥振纓王室坐嘯大邦顯治巨  
麗竊以不敏出宰勾吳上郡下邑都城接雉雖王事靡

監無失豫遊窺洞庭於五湖登姑蘇於九曲身後之事  
一至於斯今者長樂未央已夾柩里之墓公宮魯庫非  
復少昊之墟成土一棺未知何託解劔絮漿轉增欷歔  
文

為陳霸先與王僧辯盟文

賊臣侯景凶羯小胡逆天無狀構造姦惡違背我恩義  
破掠我國家毒害我生民移毀我社廟我高祖武皇帝  
靈聖聰明光宅天下劬勞兆庶亭育萬民如我考妣五

十所載哀景以窮見歸全景將戮之首置景要害之地  
崇景非次之榮我高祖於景何薄我百姓於景何怨而  
景長戟彊弩陵蹙朝廷鋸牙郊甸殘食含靈剝肝斫趾  
不慝其快曝骨焚尸不謂為酷高祖非食卑宮春秋九  
十屈志凝威憤終賊手大行皇帝溫嚴恭默丕守鴻名  
於景何有復加忍毒皇枝緦抱已上總功以還窮力極  
俎既屠且鱠豈有率土之濱謂為王臣食人之禾飲人  
之水忍聞此痛而不悼心況臣僧辯臣霸先等荷稱國

藩湘東王臣諱泣血銜哀之寄摩頂至足之恩世受先朝之德身當將相之任而不能瀝膽抽腸共誅姦逆雪天地之痛報君父之讐則不可以稟靈含識戴天履地今日相國至孝玄感靈威斯發已破賊徒獲其元帥止餘景身尚在京邑臣僧辯與臣霸先協和將帥同心共契必誅凶豎尊奉相國嗣膺鴻業以主郊祭前途若有一功獲一賞臣僧辯等不推已讓物先身帥衆則天地宗廟百神之靈共誅共責臣僧辯臣霸先同心共事不

相欺負若有違戾明神殛之

樂府

長安少年行

長安好少年  
驄馬鐵連錢  
陳王裝腦勒  
晉后鑄金鞭  
步搖如飛燕  
寶劍一作劍似舒蓮  
去來新市側  
遨遊大道邊

道邊一老翁  
顏鬢如衰蓬  
自言居一作生漢世  
少小見豪

雄五侯俱拜爵  
七貴各論功  
建章通北闕  
複道度南宮  
太后居長樂  
天子出回中  
玉輦迎飛燕  
金山賞鄧通  
一

朝復一日忽見朝市空扶桑無復海崑山倒向東少年  
何假問頽齡值福終子孫冥滅盡鄉閭復不同淚盡眼  
方暗髀傷耳自聾杖策尋遺老歌嘯詠悲翁遭隨各有  
遇非敢訪童蒙

獨酌謠

獨酌謠獨酌獨長謠智者不我顧愚夫余未要不愚復  
不智誰當余見招所以成獨酌一酌傾一瓢生涯本漫  
漫神理暫超超再酌矜許史三酌傲松喬頻煩四五酌



不覺凌丹霄，倏爾厭五鼎。俄然賤九韶，彭殤無異葬。夷  
跖可同朝，龍蠖非不屈。鵬鷄但逍遙，寄語號呶侶。無乃  
太塵蹠。

詩

從駕送軍

惟堯稱乃武，軒后號神兵。弔民資智勇，治亂屬師貞。我  
君膺寶業，歷駕視前英。蒲海方無浪，夷山未有平。星光  
下結旆，劍氣上舒精。雲開萬里徹，日麗百川明。撫鼓山

靈應詔蹕水祇驚

望郢州城

魂兮何處返非死復非僊坐柯如昨日石合

一作合石

未淹

年歷陽頓成浦東海果為田空憶扶風詠誰

一作惟

見峴

山傳世變才良改時移民物遷悲哉孫驃騎悠悠哭彼  
天

長安還至方山愴然自傷

秦軍坑趙卒遂有一人生雖還舊鄉里危心曾未平淮

源比桐柏方山似削成猶疑屯虜騎尚畏值胡兵空村  
餘拱木廢邑有頽城舊識既已盡新知皆異名百年三  
萬日處處此傷情

離合詩贈江藻

開門枕芳野井上發紅桃林中藤蔦秀木未風雲高屋  
室何寥廓至士隱蓬蒿故知人外賞文酒易陶陶友朋  
足諧晤又此盛詩騷朗月同攜手良景共舍毫藥巴有  
妙術言是神僊曹百年肆偃仰一理詎相勞

閑居  
有樂

建除詩

建章連鳳闕藹藹入雲煙  
除庭發槐柳冠劍似神僊  
滿衢飛玉軼夾道躍金鞭  
平明塵霧合薄暮風雲騫  
定交太學裏射策雲臺邊  
執事一朝謬朝市忽崩遷  
破家徒徇國力弱不扶顛  
危機空履虎擊惡豈如鷓  
成師鑿門去敗績裹尸旋  
收魂不入斗抱景問穹玄  
開顏何所說空憶平生前  
閉門窮巷里靜掃詠歸田

六府詩

水廣南山暗杖策出蓬門火炬村前發林煙樹下昏金  
花散黃蕘蕙草雜芳蓀木蘭露漸落山芝風屢翻土高  
行已冒抱甕憶中園穀城定若近當終黃石言

八音詩

金屋貯阿嬌樓閣起迢迢石頭足年少大道跨河橋絲  
桐無緩節羅綺自飄飄竹煙生薄晚花色亂春朝匏瓜  
詎無匹神女嫁蘇韶土地多妍冶鄉里足塵躡革年未  
相識聲論動風飈木桃堪底用寄以答瓊瑤

六甲詩

甲拆開衆果萬物具敷榮乙飛上危幕雀乳出空城丙  
魏舊勲業申韓事刑名丁翼陳詩罷公綏作賦成戊巢  
花已秀滿塘草自生己乃忘懷客榮樂尚闕情庚庚聞  
鳥嘯肅肅望鳧征辛酸多憫惻寂寞少逢迎壬蒸懷太  
古覆妙佇無名癸已空施位詎以召幽貞

十二屬詩

鼠迹生塵案牛羊暮下來虎嘯生

當作坐

空谷兔月向牕

開龍隰遠青翠蛇柳近  
裴徊馬蘭方遠摘羊負  
始春栽  
猴栗羞芳果雞跖引清  
杯狗其懷物外猪蠹宵  
悠哉

從遊天中寺應令

福界新開草名僧共下  
筵楊枝生拱樹錫杖咒  
飛泉石  
座應朝講山龕擬夜禪  
當非舍衛國賣地取金  
錢

同庾中庶肩吾周處士弘讓遊明慶寺

鷲嶺三層塔菴園一講  
堂馴烏逐飯磬狎獸繞  
禪牀  
擿  
菊山無酒燃松夜有香  
幸得同高勝於此瑩心  
王

名都一何綺

陸士衡擬古詩云名都一何綺城闕鬱盤桓

名都一何綺春日吐光輝高樓雪母扇複殿琉璃扉  
昭儀同輦出高安連騎歸欲知天子貴千門應紫微

為我彈鳴琴

為我彈鳴琴玉臺作清琴琴鳴傷我襟半死無人見入竈始知

音空為貞女引誰達楚妃心雍門何假說落淚自淫淫

賦得邊馬有歸心



王瓚詩胡風動秋  
草邊馬有歸心

窮秋邊馬肥向塞甚思歸連鑣渡蒲海束舌下金微已  
卻魚麗陣將攜鶴翼圍彌憶長楸道金鞭一作鞍背落暉

詠老馬


昔日從戎陣流汗幾東西一日馳千里三丈拔深泥渡  
水頻傷骨翻霜屢損蹄勿言年齒暮尋途尚不迷

和蔡黃門口字詠絕句

囂囂宮閣路靈靈谷口問誰知名器品語默各崎嶇



漢魏六朝百三家集卷一百四



總校官庶吉士臣侍朝

校對官中書臣張塤

謄錄貢士臣黃永澄

欽定四庫全書薈要

集部

漢魏六朝百三家集卷一百五



詳校官候選知縣臣吳甸華

欽定四庫全書薈要卷一萬九千六百九十八集部

漢魏六朝百三家集卷一百五

明 張溥 輯

東江總集  
賦

修心賦 有序

太清四年秋七月避地於會稽龍華寺此伽藍者余六世祖宋尚書右僕射州陵侯元嘉二十四年之所構也

侯之王父晉護軍將軍彪昔涖此邦卜居山陰都陽里  
貽厥子孫有終焉之志寺域則宅之舊基左江右湖面  
山背壑東西陵跨南北紆縈聊與苦節名僧同銷日月  
曉修經戒夕覽圖書寢處風雲馮棲水月不意華戎莫  
辯朝市傾淪以此傷情情可知矣啜泣濡翰豈攄鬱結  
庶後生君子憫余此槩焉

嘉南斗之分次肇東越之靈祕表檜風於韓什著鎮山  
於周紀蘊大禹之金書鐫暴秦之石字太史來而探穴

鍾離去而開筍信竹箭之為殄何砒砒之罕值奉盛德  
之鴻祀寓安禪之古寺寔豫章之舊圃成黃金之勝地  
遂寂默之幽心若鏡中而遠尋面曾阜之超忽邇平湖  
之迥深山條偃蹇水葉浸淫挂猿朝落饑鼯夜唵果叢  
藥苑桃蹊橘林梢雲拂日結暗生陰保自然之雅趣鄙  
人間之荒雜望島嶼之遭迴面江源之重沓汎流月之  
夜迴曳光煙之曉匝風引蜩而嘶噪雨鳴林而儵颯鳥  
稍狎而知來雲無情而自合爾乃埜開靈塔地築禪居

喜園超滯樂樹扶疎經行藉草宴坐臨渠持戒振錫庇  
影甘蔬堅固之林可喻寂滅之場斲如異曲終而悲起  
非木落而愁始豈降志而辱身不露才而揚已鍾風雨  
之掩靄倦雞鳴之聒耳幸避地而高棲馮調御之遺旨  
折四辯之微言悟三乘之妙理遣十纏之繫縛祛五惑  
之塵浮久遺榮於勢利庶忘累於妻子感意氣於疇昔  
寄知音於來祀何遠客之可悲私自憐其何已

辭行李賦



維大梁三十有六載神功懋乎開闢垂恩儲祉厯子代之盤盂盛德形容陋周年之弇石月窟向風日域仰澤要荒款塞諸戎重譯輜軒巡履聲芳亥步旌節經過事高禹跡舉皇華之盡美馳珏玉之多事或江夏之無雙匹洛陽之才子訪羽儀於廊廟旌秀異於杞梓引強學之三端賞彫文於四始顧惚侗於罕志奉朝章於信次天鳳舉而張旃濟龍沙而通賁敏異季札之聽歌譽乘屬國之銜使懷蘇子之抵掌憶千秋之畫地願自勵而

飲水揆無庸而按轡嗟負恩之無力每若寘於藜棘條  
辭東平之樂善再踐承明而游息豈異千里之奔蹠寧  
辭一錢之不直諒無期於鴻漸念有似於蟬翼荷德澤  
之需然鑿丹愚之匪飾慙借譽於瑟柱免長徭於菴極  
聊暇日以須臾每長吟以鬱紆異金石之能固若草木  
之分區進學慙於枝葉綿力謝於康衢構伯休之蓬戶  
狎仲憲之桑樞徒悅木而非智庶因谷以為愚耻矯名  
於周客寧濫響於齊竽奉棲遲以偃仰願太素之不污

雲堂賦

覽黃圖之棟宇規紫宸於太清何面勢之膠葛信不日  
之經營仰一時之壯麗跨萬古之威靈吐觸石之奇色  
混高臺之舊名若乃三階入戶百拱千楹瑩以玉琇飾  
以金英綠芰懸挿紅渠倒生於時木葉聲寒壺人唱靜  
承露擎虛相風照迥天子乃下輦開宴出豫娛神文縣  
日月思革風塵實附鳳之多幸愧屠龍之不真

貞女峽賦

倦辛苦於嶺表遂沉淪於海外迹飄飄於轉蓬情繚繞  
於懸旆駭茲峽之殄怪佇竒峯而矚矚或灑迤而西成  
乍靠隗而五曲含照曜之銀燭滄潺湲之膏玉山蒼蒼  
以墜葉樹索索而搖枝澄碧源之見底聳翠壁以臨危

勞酒賦

在陽春之仲序覽具物之芳菲帥公卿而播百穀親耒  
耜而命三推開青壇於廻甸列翠幕於清沂乃遵執爵  
之典爰降食苹之讌豁朱鳥之高牕啓黃龍之抗殿奏

帝鴻之萬舞動鈞天之九變顧曲私之亭育遞寒暑而  
徂遷謬陳力而策駘豈酬恩於暮年

山水納袍賦

有引

皇儲監國餘辰勞謙終宴有令以納袍降賜何以奉揚  
恩德因題此賦

濫時來之寵沐振長纓以祗肅奉性與之文章侍相娛  
之絲竹解女蘿之山帶佩流霞之羽服裁縫則萬壑縈  
體鍼縷則千巖映日圖島嶼之削成寫淪連之徑復埒

符采於雕煥竝芬芳於蘭菊憫四選之徂遷軫百慮之  
迴遭霜飛空而浸霧雁照月而猜弦聽風鐘之易近對  
水雷之疎懸若董衣之百結同衛服之十年嗟斑鬢之  
已颯愧冶袖之為妍謝銜珠之有報荷墜履之無捐

華貂賦 有序

領軍新安殿下以副貂垂錫仰銘恩澤謹題小賦

貴豐貂於挹婁飾惠文而見求標侍臣之密設曜毛采  
之溫柔拜文椀而影度陪武帳而香浮隨玉珩之近遠

共金璫之去留仰太山之千仞開谷中之鄙吝撤君子  
之寶飾榮小人之蓬鬢茂置醴之殊私誇賜田之薄潤  
顧朽拙之微躬早遊藝而不工逢河間之好古自隗始  
而恩隆諒維鷄之有媿庶懷昔而克終

瑪瑙益賦

翠羽流霞之杯諒無聞於瑋麗豈匹此之奇瓌爰覩殊  
特臻自西國狀驚鶴之點漬似遊龍之割刻士衡譬之  
雲采中郎羞其馬勒於時北園清夏東閣浮涼山交枝

而影雜水沉葉而流香蟬無風而引短鷺出迴而飛長  
副君海滄岳峙紙落金鏘獲阿宗之美寶命河朔之名  
觴寶出崑崙之仙阜觴即玄洲之玉酒酒既醉而還年  
益稍酌而延壽仰天縱之體物銘歌器兮何有

南越木槿賦

日及多名蕤賓肇生東方記乎夕死郭璞贊以朝榮潘  
文體其夏盛稽賦憫其秋零此則京華之麗木非於越  
之舜英南中新草衆花之寶雅什未名騷人失藻雨來



翠潤露歇紅燥曼萼疑擎低莖若倒朝霞映日殊未妍  
珊瑚照水定非鮮千葉芙蓉詎相似百枝燈花復羞燃  
暫欲寄根對滄海大願移華厠綺井上桃蟲難可雜  
庭中桂蠹豈見憐乃為歌曰啼妝梁冀婦紅妝蕩子家  
若持花並笑宜笑不勝花趙女垂金珥燕姬插寶珰誰  
知紅槿艷無因寄狹邪徒令萬里道攀折自咨嗟

詔

舉士詔

堯施諫鼓禹拜昌言求之異等久著前徽舉以滯淹復  
聞昔典斯乃治道之深規帝王之切務朕以寡昧丕承  
洪緒未明虛已日旰興懷萬機多紊四聰弗達思聞謇  
諤採其謀計王公以下各薦所知傍詢管庫爰及輿皂  
一介有能片言可用朕親加聽覽佇茲沃啓

表

讓尚書令表

臣弱歲立朝本無竒志每謂任登常伯足承基緒值梁

季不造收拙人間東竄三江南徂百越不知秦漢十有  
七年心迹退黜平生畢矣但野性疎懶不屑死增俯仰  
乖時人物多忤天飛踐祚任寄隆重謬以商丘之木遂  
比舟楫之材燕岱之石混同瑚璉之器當由崇賢使舉  
早守名節竊以天府文昌萬方之藪天官冢宰無所不  
統禮遵三獨事昭百揆曠職云久三十餘載一旦開置  
必資望實豈朝廷典私偏濫庸菲薄陛下聽覽餘辰曲  
垂昭納遂斯反汗高選具瞻則敝蓋敝帷使臣暮齒歲

制月制賒臣皓髮不以一怠

讓尚書僕射表

藻鏡官方品才人物門驚如市不慙屋漏心抱如水無  
欺暗室但屢淹星鳥每知叅素世網拘束事歸僴勉今  
此名會尤增據蒞竊以端揆副職官稱師長革履升降  
傳呼寵赫儀刑朝首冠冕彝倫兼復參總衡流匡佐聖  
治妄膺重責必踐危機

讓吏部尚書表

竊以漢置五曹方今六尚魏隆八凱擬古六卿近喻喉  
舌遠膺樞斗至如東京西晉裴王仰首伸着可得論列  
此矣但臣門基世縮晉宋以來內侍帷扈入尸衡尺或  
年甫將立或歲未強仕是以退思弱冠追傷疇昔早塵  
華任見知名輩常謂忝竊匪朝伊夕豈期梁室多故有  
志無時平生意氣颯爾零落特由邀奉嘉運千載一時  
惟奮寵靈遂臻於此

為沈君理讓僕射領吏部表

辛香以來安石以後遵其軌躅必大厦之棟梁總其寄  
任亦巨川之舟楫未有綿力薄材輕膺此舉

為衡陽王讓吳郡表

芝泥馳印發命開函闕穎之誠夏霜易實兢惶之至春  
冰可涉臨淄回軾即事何取廣川無聲頗知自匹

為蕭太保謝儀同表

阪泉野戰曾無汗馬之勞代邸運籌又闕前戈之勇薄  
伐專征早遊邊外執玉奉酎又虧朝則王人降止朝冊

遠臨奉述勅書曲停表奏滄波阻夙既杜敬仲之辭闕  
路悠長致絕趙襄之讓心馳紫路登文石而莫由目送  
白雲拜承明而無日

謝敕給鼓吹表

畧尋近古逖聽前事王文憲匡佐革命沈隱侯經綸始  
運騎吹之榮猶難忝冒以臣况此實非倫輩豈可更崇  
文物重假名器高臺迢遞未朱夏而登臨芳樹華滋非  
青春而奏曲

為陳六宮謝表

鶴籥晨啓雀釵曉映恭承盛典肅荷徽章步動雲桂香  
飄霧縠媿纏艷粉無情拂鏡愁縈巧黛息意臨牕妾聞  
漢水贈珠人間絕世洛川拾翠仙處無雙或有風流行  
雨窈窕初日聲高一笑價起兩環乃可桂殿迎春蘭房  
侍寵借班姬之扇未掩驚羞假蔡琰之文寧披悚戴

章

為陳六宮謝章



恭膺禮命愧集丹縷之顏拜奉曲私愁縈暈羽之色魯  
宮夜火伯媛匪驚楚榭奔濤貞姜何懼豈期日月騰影  
風雲寫潤乃復位崇九御聲高六列象服增華丹駟耀  
采何以弼佐王風克柔陰化兢惶竝集追想流符之詩  
荷據相并遂失鳴環之節

啓

上毛龜啓

臣聞聖王受命以代紹興日月精明之狀煙雲爛熳之

采神鼎出於汾陰寶玉開於張掖靈山奧澤卉木呈祉  
靜海澄波鱗介禔福靡不顯符瑞以固鴻基肇徵祥以  
光永世者也影合四靈光分五色懷星拖月負字銜圖

除尚書令斷表後啓

司會治本冢宰朝端措紳所屬儀刑攸在皇代以來無  
人則闕陛下將備厥職用繆臣僚不容始自庸菲以權  
物議當今藩翰至臧不無其才廊廟重臣亦有其器伏  
願檢俞往之則闡平章之道臣泌心布款有理存焉

除尚書令謝臺啓

竊以昔之冢司今日端揆項同台袞無人則闕臣之朽  
薄安可叨賁謹當奏承夜月冀奉三思之旨聲寄浮雲  
方祈九天之路

謝宮為製讓表啓

如攀珠樹徒仰照匣之輝若踐玉田不知照廡之價笑  
蓉之水亟奉北園迷迭之文屬陪南館久降噓枯之旨  
許賜凌雲之筆清夜讌斯謂言善戲黃金然諾竝遂殊

寵年齊柏寢豈報恩榮紙罄蘭臺未書悚戴

除太子詹事謝東宮啓

庇身修德濫迹端形陳蘿故葛攀附不涯解角蛻鱗超  
踰非次方辭璽會覬收渥澤

序

自序

歷升清顯備位朝列不邀世利不涉權幸嘗撫躬仰天  
太息曰莊青翟位至丞相無迹可紀趙元叔為上計吏

光乎列傳官陳以來未嘗逢迎一物干預一事悠悠風  
塵流俗之士頗致怨憎榮枯寵辱不以介意太建之世  
權移羣小諂嫉作威屢被推黜柰何命也後主昔在東  
朝留意文藝夙荷昭晉恩紀契濶嗣位之日時寄謬隆  
儀刑天府釐正庶績八法六典無所不統昔晉武帝策  
荀公曾曰周之冢宰今之尚書令也况復才未半古尸  
素若茲晉太尉陸玩云以我為三公知天下無人矣軒  
冕倘來之一物豈是預要乎弱歲歸心釋教年二十餘

八鍾山就靈曜寺則法師受菩薩戒暮齒官陳與攝山  
布上人遊款深悟苦空更復練戒運善於心行慈於物  
頗知自勵而不能蔬菲尚染塵勞以此負愧平生耳

陶貞白先生集序

昔劉向通古今之學馬融見天下之書京房察風雨之  
占裴楷曉陰陽之術子政傷於簡易季長敝於驕侈君  
明逐不旋踵公矩纔免極誅鮮有盡美之迹罕聞克終  
之譽若夫德行博敏孔室四科經術深長鄭門六藝丹

陽陶先生備斯矣至如紫臺青簡綠帙丹經玉版祕文  
瑤瓊怪牒靡不貫彼精微殫其旨趣蓋非常之絕伎命  
世之異人焉文集缺亡未有編錄門人補輯若逢遼東  
之本好事研搜如誦西河之篋奉勅校之鈔墨緘以緹  
緗藏彼鴻都副在延閣

碑

皇太子太學講碑

我大陳之御天下若水渙其長瀾瑤星躔其永厯重華

誕睿興於大鹿之野敬仲繼業盛矣鳴鳳之占兼以鴻  
才海富逸思泉瀉含毫落紙動八閩之歌謠隻句片言  
諧五聲之節奏雲飛風起追壓漢帝之辭高觀華池遠  
跨魏王之什爰復建藏書之冊開獻書之路帷帳叢殘  
家壁遺逸紫臺秘典綠帙竒文羽陵蠹迹嵩山落簡外  
史所掌廣內所司靡不飾以鉛槧雕以緗素此文教之  
脩也

吳興郡廬陵王德政碑



卓爾吾王天人可擬早成夙智謙懷虛已偃息流畧翺  
翔文史三雍雅對九師名理好古如斯學兼之矣睢陽  
肇構碣石初開賜田待士榜道求材剖符彭國述職琅  
臺去謠曙鼓留歌暮來

攝山棲霞寺碑

蓋聞天有神宮地云靈府桑欽博記始叙四衢之塔金  
朔著經因知千步之寺至如峰形甌累岫勢堂密亦烏  
足言哉南徐州琅邪郡江乘縣界有攝山者其狀似織

亦名繖山尹先生記曰山多草藥可以攝養故以攝為名馬南瞻舊落顧悌鎮戍之塢北望荒村扈謙卜筮之宅北山西南隅有外道館地俄而疫癘磨滅三清遺法未明五怖之災萬善開宗遂變四禪之境倏見齊居士平原明僧紹空解淵深至理高妙遺榮軒冕遁迹巖穴宋泰始中嘗遊此山仍有終焉之志村民野老競來諫曰山多狼虎毒虵所以久絕行踐僧紹曰毒中之毒無過三毒忠信可蹈水火猛獸亦何能為乃刊木駕峰薙

草開逕披拂，葦梗結構茅茨。廿許年不事人世，渡河息  
暴擾，篋無立，皆曰誠至。所感有法度禪師家本，黃龍來  
遊白社，梵行殫苦，法性純備。與僧紹冥契甚善，嘗於山  
舍講無量壽經。中夜忽見金光照室，光中如有臺館形  
像，豈知一念之間。人王照其香蓋，八未曾有淵石朗其  
夜室。居士遂捨本宅，欲成此寺。即齊永明七年正月三  
日，度上人之所構也。山情率易，野製疎朴，崖檐峻絕，澗  
戶幽深，卉木滋榮，四時助其雕綺，煙霞舒卷，五色成其

藻絢居士嘗夢此巖有如來光彩又因閒居依稀目見  
昔寶海梵志睡觀花臺智猛比丘行逢影窟故知神應  
非遠靈相斯在居士有懷創造俄而物故其第二子仲  
璋為臨沂令克荷先業莊嚴龕像首於西峰石壁與度  
禪師鑄造無量壽佛坐身三丈一尺五寸通座四丈并  
二菩薩倚高三丈三寸若乃圖寫瓌竒刻削宏壯蓮花  
瑩目石鏡沉暉藕絲縈髮雲崖失彩項日流影東方韜  
其大明面月馳光西照匿其成鬼大同二年龕頂放光

光色身相晃若炎山林間樹下赭如火殿禪師自識終  
期欣瞻瑞應以建武四年於此寺順寂豈非六和精進  
十念允諧向沐寶池方登金地者也齊文惠太子豫章  
文獻王竟陵文宣始安王等慧心開發信力明悟各捨  
泉貝共成福業宋太宰江夏王霍姬蕃閨內德齊雍州  
刺史田奐方牧貴臣深曉正見妙識來果竝於此巖阿  
廣收財施琢磨巨石影擬法身梁太尉臨川靖慧王道  
契真如心弘檀密見此山製置疎闊功用稀少以天監

十年八月爰撤帑歲復加瑩飾績以丹青鏤之銑塋五分照發千輪啓煥排天堂廡玉露分色接岫軒墀翠微抽影八定之侶步纖草而揚梵三慧之僧挹飛泉而動色喜園凝靜豈傲吏之凡遊深谷虛玄非愚公之俗路是以王公縉紳之輩郎吏胥史之屬步林壑陟阜壤升精舍拜道場莫不洗滌無明澣濯囂暗非直心之砥路孰能如斯者乎慧振法師志業該練心力精確度上人將就遷神深相付囑法師聿脩厥緒勸助衆功基業田

園多所創置先有名德僧朗法師者去鄉遼水問道京  
華清規挺出碩學精詣早成波若之性夙植尸羅之本  
闡方等之指歸弘中道之宗致北山之北南山之南不  
遊皇都将涉三紀梁武皇帝能行四等善悟三空以法  
師累降徵書確乎不拔天監十一年帝乃遣中寺釋僧  
懷靈根寺釋慧今等十僧詣山諮受三論大義賈誼曰  
學聖道如日之明孫卿云登高山知天之峻今之探賸  
其此之謂南蘭陵蕭朮幽棲抗志獨法絕羣遁世茲山

多歷年所臨終遺言葬法師墓側還符田豫託西門之  
冢更似梁鴻偶要離之瘞又按神錄云楚靳神在今臨  
沂縣齊永明初神詣法度道人受戒自通曰靳尚即楚  
大夫之靈也大同元年二月五日神又見形著菩薩巾  
披袈裟閑雅甚都來入禪堂請寺衆說法崑嶺之中百  
神所在首陽之路八駟竝驅未有修淨戒之品詣得道  
之僧整忍辱之衣入安禪之室是知名山大澤靈異憑  
依者矣慧布法師幼落煩惱早出塵勞律儀明白貞節



峻遠貫綜三乘不自媒銜楷模七衆無所詆訶曩日靜  
懃鍾巖余便觀止滄仁飲德十有餘年頃於攝阜受持  
珠戒佩服之敬雖敢怠於斯須汲引之勞且曷伸於報  
効夫言意難盡鉛槧易凋固比河山莫如金石凡諸徵  
應并預隨喜竝勒於碑左乃為頌曰

漫漫心火冥冥世流論生若寄喻死如休三明未了十  
智難周盡纏癡愛豈離瘡疣敬仰雞足恭聞鷲頭斯風  
可羨其路何由我開梵宇面壑臨丘我圖靈跡果植因

修兼金畫繪泐石彫鏤連雲出沒泄雨沈浮經行松磴  
禪坐蕙樓澗風長瀉崖溜懸抽花臺似雪夏室疑秋名  
僧宴息勝侶薰修三乘謂筏六度為舟金幢合蓋寶駕  
驅輶地祇來格天衆追遊五時無爽七處相侷辭題翠  
琰字勒銀鈎賢乎樂餌過客宜留

大莊嚴寺碑

蓋聞僧伽水濱波斯創以禪地醍醐山頂舍那肇其梵  
域此乃往劫之勝因上方之妙範於是俯察地勢懸之

以水仰惟皇極揆之以日百堵咸作千坊洞啓前望則  
紅塵四合見三市之盈虛後睇則紫閣九重連雙闕之  
聳峭加以園習歡喜水成功德池溢甘露不因玉掌樹  
搖音樂無待金奏薰爐夜藝遙來海岼之香法鼓晨謹  
非動泗濱之石擢莖金表跨八萬之俱成界道銀繩面  
四衢而拓製厠壁綴珠凌丹霞而結宇雕光縷采望紫  
極而開軒俯看驚電影徹琉璃之道遙拖宛虹光徧水  
精之域層楹刻桷風伯走而未升靈櫟飛甍雨師攀而

不逮銘曰

灼爍金莖崔嵬銀表翔鷲仰翥威鳳靈矯木密聯綿香  
泥繚繞日圖檐外荷披棟杪翠落陰虬珠填陽鳥高僧  
累萃願學茲多弘宣方等博綜園陀皆傷寸晷竝悟尺  
波式旌鏤碣無待雕戈標年刹土比數恒河

建初寺瓊法師碑

夫智慧精進皆曰第一妙德淨名並稱不二若乃幹五  
欲之泥解六情之網禦寶車之跡面香城之路荷持像

法汲引人倫惟此法師心力備矣東山北山之部貫花  
散花之句竝編成成簡題蒲就業學非全朔無待冬書  
師夢尹儒自知穉駕銘曰

屑屑人世茫茫大千欲流心火意樹身田老驚靈籥孔  
惜逝川三空莫辯二諦何詮佛日初照慈雲不偏秋露  
寂滅莫繫悠然

明慶寺尚禪師碑銘

百世之上百世之下含章隱璞明真照假空行已無希

音和寡不有耆德誰其繼者朗月靈懸高風獨寫

贊

香贊

海岸相傳香流大千不吹自轉將銷更燃縈空雜霧散  
迥飛煙還符戒品薰修福田

花贊

池中寶花葉覆金沙逆風氣亂映水光斜散由天女賣  
乃王家若生心樹願結因牙

燈贊

寶燈夜開光遍花臺烟抽細燄燼落輕灰珠慙色竝月  
耻光來一明暗室若遣塵埃

幡贊

金幡化成搖蕩相明留無定影散乃俱輕光分紺殿采  
布香城恒知自轉福與之生

頌

莊周頌

玉潔蒙縣蘭薰漆園丹青可久雅道斯存夢中化蝶水  
外翔鯤出俗靈府師心妙門垂竿自若重聘忘言悠哉  
天地共是籠樊

銘

永陽王齋後山亭銘

叢臺造日溜館連雲錦牆列績繡地成文吾王卓爾逸  
趣不羣梅梁蕙閣桂棟蘭粉竹深蓋雨石暗迎曛激流  
疑疏構峰似削苔滑危磴藤攀聳萼樹影搖牕池光動



幕月澄遙淑風清近壑雪岸難消花園易落高桐百尺  
垂楊五株開榮九畹結秀三珠山條紫的水葉紅鬚抽  
芳繞雷接翠分衢亭謹旅鶴浦澡驚鳧前列枚馬後招  
申白諷誦楚詩精微沛易叢桂留賞散金匪惜不羨睢  
陽還嗤碣石馳聲終古服義無斁

芳林園天淵池銘

有序

歲次執徐月維大呂爰命梓匠廣修畚鍤標置舊趾開  
浚昔基東西彌望雲霧之所澄蕩南北紆縈虹霓之所

引曜曉川漾壁似日御之在河宿夜浪浮金疑月輪之  
馳水府前瞰萬雉列榭參差却拒三韻危巒聳峭瓌鳥  
異禽自學歌舞神木靈卉不知搖落昔叔皮覽海序螭  
蛟之汎濫吉甫臨舟美檉松之翦茸尚復著在吟咏緘  
彼緹紉况我君門盛事未紀謬頒待詔謹製銘云  
石溝溜密蘭渚潮平九華閣道百丈層盈液搖殿色殿  
寫波明

玄圃石室銘

僊巖石榻僊宇石墻地云正域道示修羊紫煙碧露絳  
雪玄霜廣成不踐王烈未翔移華甲觀徒構震方遠跨  
飛梁俛臨倒景瓊藥珠樹金階玉井映日分暉搖風共  
影岫濃翠合林虛桂靜朔去偷桃董來貨杏檐非刻削  
戶恣登臨迎春花近避暑涼深秋雲卷閭冬霰停陰桐  
棲鳳采竹化龍吟輕飛亂色激溜成音天縱儲睿生知  
作兩絃誦餘隙仁智為賞河曲停遊洛濱息往祥梨吐  
秀瑞燕流響一物或鑄萬國斯仰

懷安寺刹下銘

四聰睿后萬行了因運光玉鏡道茂金輪爰構靈刹地  
迹重闈迎風雲表承露天津飛甍巖嶭累棟嶙峋護持  
七衆警衛百神籌銷草木劫盡沙塵支提永固福業恒  
新變易東海長久北辰

方鏡銘

有引

此鏡以照著衣鏡背圖刻八卦二十八宿仁壽殿前無  
以加斯彫麗也

玄枵命巧仲呂呈祥金鑄石漢銅鑄丹陽價珍負局影  
麗高堂圖星擬蓋寫卦隨方明齊水止照與天長增輝  
兔苑永侍龍光

鐘銘

鳧氏之匠徂陽之銅圖鑿鑄鑄刻獸鑄蟲聲飛雪裊韻  
切唇中遙符玉律遠雜金風朝驚鷲鷲嶺夜動龍宮冀憑  
慧業冥感神功百非洗蕩萬善招通長如五淨永証三  
空

又

篆間鐫刻樂上雕鐫聲齊法鼓響逸鳴捷舟移巨壑火  
壞初禪

優填像銘

如花譬像若火疑龍毫光此遇法相今逢眸雲齒雪月  
貌金容大仙下降避席為恭

哀策文

陳宣帝哀策文

望蜃縉而攀標拜龍叢而慟絕變五統而淒涼廻三辰  
而慘切感川岳而地維傾號穹蒼而天柱折千秋茂德  
萬世鴻名爰詔掌禮式序英聲其辭曰

媯水樞宿姚墟大虹謳歌承厯揖讓受終重規帝緒踵  
武王風名山紀迹清廟傳功我后丕承思弘祖業莅政  
恭已臨朝凝默煥爛九功歲蕤七德憲章昭著威靈允  
塞爰茲發迹天步艱難連華滕衛比譽應韓羽儀戚右  
軒冕朝端祈膺當璧絲顯大橫延喜授玉告善飛旌神

器有奉性道無名詩頌唐年樂舞姬日仁聲汪濊武義

洋溢理訟總街凝情衢室巡望如禮幽祇咸秩疆垂叛

援闕徼虔劉治兵丹浦獲醜青丘屠釣且拔管庫方搜

如龍駕鼓獻雉焚表天必呈祥地寧愛寶神禽竒獸嘉

穀靈草屈軼抽階飛黃伏皂綺雲舒慶珠星照老廣敷

丘索弘啟膠庠書林吐馥文圃含鏘南洽侯衛北暢遐

荒殷羅自解周圍無傷金英掩色玉床弗豫天駟催鑣

王良失御鑄鼎奚益綴衣何處漫漫幽夜冥冥上仙長



違拜日失意祈年寧神卜兆晏駕迴天銅麟感泣銀海  
埋田出德陽之廣殿動繁茄之哀嘯渡洛水之浮橋望  
偃師之近縣背紫陌而未遠隱黃山而不見鐸啓挽而  
依依馬嘶風而戀戀平原欲晦落照將垂鳳蓋飄而水  
暗鸞蹕聳而山危曳虵旗之舒卷間翠野之參差鳥哀  
哀而驚曙松瑟瑟而吟枝異故鄉之絲竹非舊宅之塤  
篪掃秋葉而無盡薦春櫻而願知北邙已謝西陵何有  
遠宿蒼梧便乖仁壽聲合韶濩道宣戶牖共瀛海而恒

流竝嵩華而莫朽

誄

梁故度支尚書陸君誄

君諱襄字師卿吳人也祖惠徹宋車騎府法曹行參軍  
父閑揚州別駕齊永元紹歷蕭遙光謀反伏誅閑以州  
職見害子絳其日并命忠孝之道萃此一門襄時年十  
四號毀殆滅布衣蔬食終於身世起家著作佐郎出為  
永寧縣令累遷臨川王廬陵王法曹外兵記室入為太

子洗馬掌管記中書舍人管記如故為丹陽尹丞俄遷  
太子庶子掌管記揚州治中太子家令領國子博士管  
記如故丁母顧夫人憂廬乎墓所服闋又從家令轉中  
庶子竝掌管記遷中散大夫金華宮家令出為鄱陽內  
史除尚書吏部郎秘書監領揚州大中正度支尚書太  
清二年三月京師傾覆君竄跡還鄉吳民陸黯起義民  
攻郡擾攘之際憂憤而終春秋七十有二余避世河澨  
暫之吳國百舍不容千里無饋陸公國士之眷惠好之

深朝同飢粥夕共瓢飲契濶晤言流連晦朔日月逝矣  
懷古何忘臨哀能誅久願搖筆時事屯邅不遑削藁梁  
季適越未戢干戈陳世入仕累牽物役杼軸於懷四十  
餘載隋開皇九年於長安致仕懸車已泊就木幾何但  
東海成田南冠永繫龜山更促空想吹笛之哀馬角徒  
生絕望通波之水嗚呼哀哉攬涕操觚乃為誄曰

媯苗碩茂完齋繁昌賓門穆穆筮士錡錡食采命氏遐  
哉陸鄉四昇臺省八辟賢良分柯振葉令聞令望玄筵

朱鞞翠弁金鐙流聲世祀列讚祠堂別駕貞烈志存名  
教捐生徇主知死不撓暉映泉壤痛此忠孝於鑠夫子  
積德累仁韜光戢耀隱璞含真居哀能痛至情通神淚  
枯瓏樹哀感馴禽永慟家禍長號不辰玄黃絕睇蔬布  
終身心符屈婞室等原貧分甘共感內族外姻求之今  
古斯為異人月下奏章螢前讀史給紙蘭臺觀書洛市  
強學待問潤身為已結髮濯纓登朝入仕昂昂逸驥逐  
日千里宛宛長離陵江迅起枳棘棲鳳化行乳雉平臺

累涉石扇躡履跼伏不競芬絲自理綺席無譏師訓胄  
子驥足時務俊民斯俟秋實選能春華備美思媾儲后  
遊息承華書記策擢爵命增加彈碁擊筑沉李浮瓜追  
隨飛蓋侍從鳴笳二儀迴幹四氣淹賒離景遽沉前星  
奄滅撫已惟舊懷恩守節昔荷故臣攀號聲折登高能  
賦大夫就列金華式肇更奉清切修竹貞松含霜抱雪  
下車軒日求瘼康時良辰坐嘯朗夜卧治懸魚化靜佩  
犢去思廣弘條教精察毫釐典選搜揚操刀密勿不紊

朱紫傍無請謁秘署學林得人超忽延閣緗素校文遺  
闕工妙鉛槧譽成朞月雁行攸序龍作簡才讓珠不拜  
賜劍恩來帝曰俞往爾行兼該金城失險玉弩流災年  
臻几杖病息草萊世故天禍臣悲主辱露盡朝陽風驚  
夜燭黃鵠超遙白駒何促事迫歸魂依然啓足悠悠世  
路辛苦艱虞尋戈滿道暴骨交衢家無半菽絕地飛芻  
念君桑梓零落凋枯傷君井邑子戾崎嶇喪亂絕卜葵  
藿荒蕪淒涼故友擗標遺孤臨穴外野撫棺窮途嗚呼

哀哉為善豈懼修名難假德履中和道周文雅不朽之迹非謂泉下疊疊清風泠泠獨寫嗚呼哀哉

墓誌銘

廣州刺史歐陽頎墓誌

公家習尚書少府儒高於漢冊世居渤海太守文重乎晉原中原喪亂避地南徙公孝敬純深友悌敦睦家積遺財竝讓諸季兼賙同壤公含章內映遠識沉通室嗜欲謹言行資貞幹事廉隅梁室不造凶羯憑陵公被銳



執允有志匡復梁孝元帝授散騎常侍東衡州刺史始  
興縣侯而犬戎弑逆宗社播遷陳纂揖讓攸歸高祖恩  
加惟舊授使持節都督南衡二十二州諸軍事廣州刺  
史進為開府儀同三司山陽郡公進號征南將軍加鼓  
吹一部巫山遠曲喧騎吹於日南芳樹清音肅軍容於  
海截追贈車騎將軍司空公涉獵六經優游百氏寬徭  
省賦化百越之歸心撫寒投醪感三軍之死力在室如  
賓寧慚屋漏不貪為寶每畏人知殺青無兼兩之疑蕙

豈豈懷珠之謗如羊如粟不改夷齊之心遺慶流風方  
留豹產之德

特進光祿大夫徐孝穆墓誌

耕耘書圃弋獵文場藻思綺合尺牘繡揚辭奔太史筆  
利干將心緘武庫口定雌黃奉使巡採絕域遐深市朝  
遷貿陵谷相侵形寄王績名宣攀附高排閭闔鬱轉雲  
路年踰致仕齒及懸車夜漏方盡馳光復斜平原出宿  
庠序為家隴愁宿霧松悲閑鳥地迴雲低山重樹小九

原孤月三泉送旒疇曩行役共上河梁余因病免君事  
遠將痛心期之徂謝憫時代之銷亡冀鐫石於玄冢留  
清風於故鄉

司農陳暄墓銘

其文散翫其筆縱橫背碑即誦據馬俄成誹諧見賞調  
笑忘情兩宮寵官四主恩榮萬事依息一朝追送疇昔  
命觴文可吟諷今日酌酒長悲且慟

中領軍魯廣達墓銘

災沅淮海險失金湯時屯運極代革天亡爪牙背義介  
胄無良獨標忠勇率禦有方誠貫皎日氣勵嚴霜懷恩  
感報撫事何忘

侍中沈欽墓誌

早結南陽之親致興沛市之役四埏多難三江屢梗君  
敦淳化以勵澆風庶滌清流以蕩濁俗早邁紫雲萍濡  
碧海奮里閑之寵躍車馬之貴晒竇氏之青山恥郭家  
之金穴

文

羣臣請陳武帝讖文

某位某甲稽首和南十方三世一切諸佛十方三世一切尊法十方三世一切賢聖見前大德僧皇帝某菩薩睿哲聰明廣淵齊聖心若虛空照窮般若發弘大誓荷負衆生神道會昌膺茲景業百王既季運屬艱難五嶽維塵六軍日動劬勞在念有切皇心既而深悟苦空極言無我寶臺華柱本非實錄賊城樓櫓苦具茲多遂坐

道場靜居禪室堅固善本具足檀那石壁山河珍車寶

馬頭目髓腦妻子國城鑿輅龍章翠帳玉几福德所感

威惠所及莫不肅然大捨供養三尊便欲拂衣崆峒高

步六合到林間而宴坐與釋衆而同遊紫微虛宮黃屋

曠位上靈聳動厚士怔惶弟子等身纏愛惑業構煩惱

天生烝民樹以司牧慄慄黔首非后罔戴豈容尊居萬

乘而伸獨往之情應在帝王而為布衣之事且蠻夷猾

夏寇賊姦宄燧人警職日照甘泉之火四郊多壘未肆

樓船之威若使七聖遂迷宵然汾水之上八駿沃若方  
在瑤池之濱則天下何依羣臣莫奉宗社廟堂有廢彛  
則弟子不勝狼狽之切謹捨如干錢如干物仰覲三寶  
大衆奉贖皇帝及諸王所捨悉還本位伏願十方三寶  
見前大德僧以慈悲力用無礙心坐道放光顯揚宣說  
勸喜和合超然降許當使皇帝望雲望日之姿與南山  
等固乃神乃聖之德與北極同尊中宮后妃之星金禎  
玉幹之戚窮積善之慶盡萬歲之懽玉鑿迴鑣金門洞

啓百辟翹首措紳竝列願塵勞與雲沴俱銷億兆與天  
地同泰慊慊丹愚敢以死請弟子某和南

樂府

雉子斑

麥壠新秋來澤雉屢襄徊依花似協妬拂草乍驚媒三  
春桃照李二月柳爭梅暫住如臯路當令巧笑開

隴頭水二首

隴頭萬里外天涯四面絕人將蓬共轉水與啼俱咽驚



湍自湧沸古樹多摧折傳聞博望侯苦辛提漢節  
霧暗山中日風驚隴上秋徒傷幽咽響不見東西流無  
期從此別更度幾年幽遙聞玉關道望入杳悠悠

折楊柳

萬里音塵絕千條楊柳結不悟倡園花遙同羌嶺雪春  
心自浩蕩春樹聊攀折共此依依情無奈年年別

關山月

兔月半輪明狐關一路平無期從此別復欲幾年行映

光書漢奏分影照胡兵  
流落今如此長戍受降城

洛陽道二首

德陽穿洛水伊闕邇河橋  
仙舟李膺棹小馬王戎鑣  
杏堂歌吹合槐路風塵饒  
綠珠含淚舞孫秀彊相邀

小平路

一作臨

四達長楸聽五鐘  
玉節迎司隸錦車歸濯

龍弦歌聲不息環珮響相從  
花障蕩舟笑日映下山逢

長安道

翠蓋乘輕霧金羈照落暉  
五侯新拜罷七貴早朝歸  
轟

轟紫陌上藹藹紅塵飛日暮延平客風花拂舞衣

梅花落二首

縹色動風香羅生枝已長妖姬墜馬髻未插江南璫轉  
袖花紛落春衣共有芳羞作秋胡婦獨採城南桑  
胡地少春來三年驚落梅偏疑粉蝶散乍似雪花開可  
憐香氣歇可惜風相摧金鏡且莫韻玉笛幸裴徊

紫騮馬

春草正萋萋蕩婦出空閨識是東方騎猶帶北風嘶揚

鞭向柳市細蹠上金堤願君憐織素殘妝尚有啼

驄馬驅

長城兵氣寒飲馬詎為難暫解青絲轡行歇縷衢鞍白  
登圍轉急黃河凍不乾萬里朝飛電論功易走丸

雨雪曲

雨雪隔榆溪從軍度隴西遶障看孤迹依山見馬蹄天  
寒旗彩壞地暗鼓聲低漫漫愁雲起蒼蒼別路迷

劉生

劉生負意氣長嘯且裘徊高

一作辯

論明秋水命賞陟春

臺干戈倜儻用筆硯縱橫才置驛無年限遊俠四方來

病婦行

窈窕懷貞室風流挾琴婦唯將角枕卧自影啼妝久羞  
開翡翠帷嬾對葡萄酒深悲在縑素託意忘箕帚夫婿  
府中趨誰能大垂手

置酒高殿上

三清傳旨酒柏梁奉歡宴霜雲動玉葉凍水疎金箭羽

簫響鐘石流泉灌金殿盛時不再得光景馳如電

今日樂相樂

綺殿文雅道玳筵歡趣密鄭態逶迤舞齊絃窈窕瑟金  
壘送縹觴玉井沉朱實願此北堂宴長奉南山日

簫史曲

弄玉秦家女簫史仙處童來時兔月滿去後鳳樓空密  
笑開還歛浮聲咽更通相期紅粉色飛向紫烟中

詠燕燕于飛應詔

二月春暉暉雙燕理毛衣銜花弄葳靡拂葉隱芳菲或  
在堂間戲多從幕上飛若作仙人履終向日南歸

濟黃河

葱山淪外域鹽澤隱遐方兩源分際遠九道派流長未  
殫所聞見無待驗詞章留連嗟太史惆悵踐黎陽導波

縈地節

一作脈

疏氣耿天潢憫周沈用寶嘉晉肇為梁

橫吹曲

簫聲鳳臺曲洞吹龍鍾管鏜鎔漁陽摻怨抑胡笳斷

怨詩二首

採桑歸路河流深憶昔相期柏樹林  
奈許新繚傷妾意  
無由故劔動君心

新梅嫩柳未障羞情去恩移那可留  
團扇篋中言不分

拾遺纖腰掌上詎勝愁  
作盡

烏棲曲

桃花春水木蘭橈金羈翠蓋聚河橋  
隴西上計應行去  
城南美人啼著曙



東飛伯勞歌

南飛烏鵲北飛鴻  
弄玉蘭香時會同  
誰家可憐出牕牖  
春心百媚勝楊柳  
銀牀金屋挂流蘇  
寶鏡玉釵橫珊瑚  
年時二八新紅臉  
宜笑宜歌羞更歛  
風花一去杳不歸  
祇為無雙惜舞衣

雜曲三首

行行春逕蘼蕪綠  
織素那復解琴心  
乍愜南階悲綠草  
誰堪東陌怨黃金  
紅顏素月俱三五  
夫婿何在追虜

關山隴月春雪冰

一作深

誰見人啼花照戶

殿內一處起金房併

玉臺作便

勝餘人白玉堂珊瑚挂鏡臨

網戶芙蓉作帳照雕梁房櫳宛轉垂翠幕佳麗逶迤隱

珠箔風前花管颺難留舞處花鈿低不落陽臺通夢太

非真洛浦凌波復不新曲中唯聞張女調

一作曲

定有同

姓可憐人但願私情賜斜領不願傍人相比竝妾門逢  
春自可榮君面未秋何意冷

泰山言應可轉移新寵不信更參差合懽錦帶鴛鴦鳥

同心綺袖連理枝皎皎新秋明月開  
白露飛螢暗裏來  
鯨燈落花殊未盡  
虬水銀箭莫相催  
非是神女期河漢  
別有仙姬入吹臺  
未眠解著同心結  
欲醉那堪連理杯  
後宮不愜茱萸芳  
夜夜爭開蘇合房  
寶釵翠鬢還相似  
朱脣玉面非一行  
新人未語言如澀  
新寵無前判不臧  
願奉更衣蘭麝氣  
恐君馬到自驚香

梅花落

臘月正月早驚春  
衆花未發梅花新  
可憐芬芳臨玉臺

朝攀晚折還復開長安少年多輕薄兩兩共唱梅花落  
滿酌金卮催玉柱落梅樹下宜歌舞金谷萬株連綺甍  
梅花密處歲嬌鶯桃李佳人欲相照摘葉一作藥牽花來  
竝笑楊柳條青樓上輕梅花色白雪中明橫笛短簫淒  
復切誰知柏梁聲不絕

宛轉歌

七夕天河白露明八月濤水秋風驚樓中恒聞哀響曲  
塘上復有辛苦行不解何意悲秋氣直置無秋悲自生

不怨前階促織鳴偏愁別路擣衣聲別燕差池自有返  
離蟬寂寞詎含情雲聚懷清四望臺月冷相思九重觀  
欲題芍藥詩不成來採芙蓉花已散金樽送曲韓娥起  
玉柱調絃楚妃歎翠袖結恨不復開寶鬢迎秋度前亂  
湘妃拭淚灑貞筠莢藥浣衣何處人步步香飛金薄履  
盈盈扇掩珊瑚屑已言採桑期陌上復能解佩就江濱  
競入華堂要花枕爭開羽帳奉華茵不惜獨眠前下釣  
欲許便作後來薪後來暝暝同玉牀可憐顏色無比方

誰能巧笑特窺井乍取新聲學繞梁宿處留嬌墮黃珥  
鏡前含笑弄明璫菴苑摘心心不盡茱萸折葉葉更芳  
已聞能歌洞簫賦詎是故愛邯鄲倡

閨怨篇

寂寂青樓大道邊紛紛白雪綺牕前池上鴛鴦不獨自  
帳中蘇合還空然屏風有意障明月燈火無情照獨眠  
遼西水凍春應少薊北鴻來路幾千願君關山及早度  
念妾桃李片時妍

又

蜘蛛作絲滿帳中芳草結葉當行路紅臉脈脈一生啼  
黃鳥飛飛有時度故人雖故昔經新新人雖新復應故

姬人怨

天寒海水慣相知空牀明月不相宜庭中芳桂憔悴葉  
井上疎桐零落枝寒燈作花羞夜短霜雁多情恒結伴  
非為隴水望秦川直置思君腸自斷

姬人怨服散篇

薄命夫婿好神仙  
逆愁高飛向紫烟  
金丹欲成猶百練  
玉酒新熟幾千年  
妾家邯鄲好輕薄  
特忿仙童一九藥  
自悲行處綠苔生  
何悟啼多紅粉落  
莫輕小婦狎春風  
羅襪也得步河宮  
雲車欲駕應相待  
羽衣未去幸須同  
不學簫史還樓上  
會逐姮娥戲月中

長相思三首

襟言

長相思久離別  
征夫去遠芳音滅  
湘水深隴頭  
咽紅羅  
斗帳裏  
綠綺清絃絕  
逶迤百尺樓  
愁思三秋結



長相思久別離春風送燕入簷窺暗開脂粉弄花枝紅  
樓千愁色玉筋兩行垂心心不相照望望何由知

詩

秋日侍宴婁苑湖應詔

以下  
五言

翠渚還鑿輅瑤池命羽觴千門響雲蹕四澤動榮光玉  
軸昆池浪金舟太液張虹旗照島嶼鳳蓋繞林塘野靜  
重陰潤淮秋水氣涼霧開樓闕近日迴烟波長洛宴諒  
斯在鎬飲詎能方朽劣叨榮遇簪笏奉周行

侍宴元武觀

詰曉三春暮，新雨百花朝。  
星宮移渡罕，天駟動行鑣。  
旆轉蒼龍闕，塵飛飲馬橋。  
翠觀迎斜照，丹樓望落潮。  
鳥聲雲裏出，樹影浪中搖。  
歌吟奉天詠，未必待聞韶。

宴樂脩堂應令

肅城通甲觀，承華啓畫堂。  
北宮降恩賞，西園度羽觴。  
殊私奉玉裕，終宴在金房。  
庭暉連樹彩，簷影接雲光。  
仙如伊水駕，樂似洞庭張。  
彈絲命琴瑟，吹竹動笙簧。  
庸疎濫

應阮哀朽惡連章

三日侍宴宣遊堂曲水

上巳娛春禊芳辰喜月離北宮命簫鼓南館列旌麾繡  
柱擎飛閣雕軒傍曲池醉魚沉遠岫浮棗漾清漪落花  
懸度影飛絲不礙枝樹動丹樓出山斜翠磴危禮周羽  
爵遍樂闕光陰移

秋日遊昆明池

靈沼蕭條望遊人意緒多終南雲影落渭北雨聲過蟬

噪金隄柳鷺飲石鯨波珠來照似月織處寫成河此時

一作臨水歎非復採蓮歌

秋日登廣州城南樓

秋城韻晚笛危榭引清

一作淒

風遠氣疑埋劍鷺禽似避

弓海樹一邊出山雲四面通野火初烟細新月半輪空  
塞外離羣客顏鬢早如蓬徒懷建鄴水復想洛陽宮不  
及孤飛雁獨在上林中

贈洗馬袁朗別

賈誼登朝日終軍對奏年  
校文升廣內撫劍入崇賢  
竒才殊艷逸將別更留連  
驅車命鏡管拱坐面林泉  
池寒稍下雁木落久無蟬  
露浸山扉月霜開石路烟  
高談無與慰遲爾報華篇

詒孔中丞真

我行五嶺表辭鄉二十年  
聞鶯欲動詠披霧即依然  
疇昔同寮宋今隨年代改  
借問藏書處唯君故人在  
故人  
名宦高霜簡肅權豪誰知  
懷九歎徒然泣二毛步出  
東

郊望心游江海，上遇物便今古。何為不惆悵，初晴原野  
開。宿雨潤條枚，叢花曙後發。一鳥霧中來，淹留蘭蕙苑。  
吟嘯芳非晚，忘懷靜躁間。自覺風塵遠，白社聊可依。青  
山乍採薇，鍾牙乃得性。語默豈同歸。

贈賀左丞蕭舍人

輜軒通八表，旌節駕三秦。聽歌酬敏對，繼好佇行人。賀  
生思沉鬱，蕭弟學紛綸。共有筆端譽，皆為席上珍。離羣  
徒悄悄，征旅日駢駢。黃河分太史，一曲悲千里。海內平。

生親中朝沅寓士痛哉憫梁祚于焉三十祀鍾儀繫不  
歸盛憲悲何已隴頭心斷絕爾為參生死回首望長安  
猶如蜀道難函關分地軸華嶽接天壇行旌方境逝去  
棹艤江干蘆花霜外白楓葉水前丹翔鷗方怯凍落雁  
不勝彈輝輝盛王道時務嬰疲老九沅倦耳目十年變  
懷抱何以敦岐路淒然綴辭藻江南有桂枝塞北無萱  
草斗酒未為別垂堂深自保

遇長安使寄裴尚書

傳聞合浦葉遠向洛陽飛北風尚嘶馬南冠獨不歸去  
雲目徒送離琴手自揮秋蓬失處所春草屢芳非太息  
關山月風塵客子衣

別南海賓化侯

石關通越井蒲澗瀾靈洲此地何遼夙羣英逐遠遊高  
才表彥伯令譽許文休悠焉值君子復此映芳猷嶠函  
多險澁星瑄壯環周分岐泣世道念別傷邊秋斷山時  
結霧平海若無流驚鷺一羣起哀猿數處愁是日送歸



客為情自可求終謝能鳴雁還同不繫舟其如江海泣  
惆悵徒離憂

庚寅年二月十二日遊虎丘山精舍

縱棹憐迴曲尋山靜見聞每從芳杜性須與俗人分貝  
塔涵流動花臺偏領芬蒙龍出簷柱散漫繞牕雲情幽  
豈狗物志遠易驚羣何由狎魚鳥不願屈玄纁

入龍丘巖精舍

法堂猶集雁仙竹幾成龍聊承丹桂馥遠視白雲峯風

牕穿石竇月牖拂霜松暗谷留征鳥空林徹夜鍾陰崖  
未辨色壘樹豈知重溘此哀時命吁嗟世不容無由訪  
詹尹何去復何從

明慶寺

十五詩書日六十軒冕年名山極厯覽勝地殊留連幽  
崖聳絕壁洞穴瀉飛泉金河知證果石室乃安禪夜梵  
聞三界朝香徹九天山階步皎月澗戶聽涼蟬市朝霑  
草露淮海作桑田何言望鍾嶺更復切秦川

入攝山棲霞寺有序

壬寅年十月十八日入攝山棲霞寺登岸極峭頗暢  
懷抱至德元年癸卯十月二十六日又再遊此寺布  
法師施菩薩戒甲辰年十月二十五日奉送金像還  
山限以時務不得恣情淹留乙巳年十一月十六日  
更獲拜禮仍停山中宿永夜留連棲神悚聽但交臂  
不停薪指俄謝率製此篇以記即目俾後來賞者知

余山志

淨心抱冰雪暮齒逼桑榆太息波川迅悲哉人世拘歲  
華皆採獲冬晚共嚴枯濯流濟八水開襟入四衢茲山  
靈妙合當與天地俱石瀨乍深淺崖烟遞有無缺碑橫  
古隧盤木卧荒塗行行備履歷步步鞦韆一作威紆高僧  
迹共遠勝地心相符樵隱各有得丹青獨不渝遺風佇  
芳桂此德喻生芻寄言長往客悽然傷鄙夫

遊攝山棲霞寺

有序

禎明元年太歲丁未四月十九日癸亥入攝山展慧

布法師憶謝靈運集還故山入石壁中尋曇隆道人  
有詩一百十一韻今此拙作仍學康樂之體

霖霖時雨霽清和孟夏肇棲宿綠野中登頓丹霞杪敬  
仰高人德抗志塵物表三空豁已悟萬有一何小始從  
情所寄冥期諒不少荷衣步林泉麥氣涼昏曉乘風面  
泠泠候月臨皎皎烟崖憩古石雲路排征鳥披逕憐森  
沉攀條惜杳裊平生忘是非朽謝豈矜矯五淨自此涉  
六塵庶無擾

攝山棲霞寺山房夜坐簡徐祭酒周尚書并同

遊羣彥

澡身事珠戒非是學金丹月磴時橫枕雲崖宿解鞍  
梵宇調心易禪庭數息難石澗水流靜山牕葉去寒  
君思北闕駕我惜東都冠翻愁夜鐘盡同志不盤桓

靜卧棲霞寺房望徐祭酒

絕俗俗無侶修心心自齋連崖夕氣合虛宇宿雲靈卧  
藤新接戶款石久成階樹聲非有意禽戲似忘懷故人

市朝狎心期林壑乖唯憐對芳杜可以為吾儕

營湮槃讖還塗作

有序

禎明二年仲冬攝山棲霞寺布法師只爾待終余以  
此月十七日宿昔入山仰為師氏營湮槃讖還塗有  
此作

可否同一貫生死亦一條況期滅盡者豈是俗中要人  
道離羣愴冥期出世遙留連入澗曲宿昔陟巖椒石溜  
冰便斷松霜日自銷向崖雲霰黓出谷霧飄飆勿言無

大隱歸來即市朝

至德二年十一月十二日升德施山齋三宿決

定罪福懺悔詩

四知無矯志二施啓幽心  
簡通避人物偃息還山林  
曲澗停騶響交枝落幔陰  
池臺聚凍雪欄牖噪歸禽  
石彩無新故峯形詎古今  
大車何杳杳奔馬遂駸駸  
何以修六念虔誠在一音  
未泛慈舟遠徒令願海深

詠採甘露應詔



祥露曉氛氲上林朝晃朗千行珠樹出萬葉瓊枝長徐  
輪動仙駕清宴留神賞丹水波濤汎黃山烟霧上風亭  
翠旒開雲殿朱絃響徒知恩禮洽自憐名實爽

借劉太常說文

劉棻慕子雲許慎詢景伯碩學該蟲篆奇文秀鳥跡曰  
余徒下帷待問垂重席不詣王充市聊投班玩籍三寫  
徧鑽研六書多補益幽居服藥餌山宇生虛白留連嗣  
芳杜曠蕩依泉石夫君愛滿堂願言馳下澤

賦得一日成三賦應令

副君睿賞道清夜北園遊下筆成三賦傳觴對九秋飛  
文綺縠采落紙波濤流樹密寒蟬響簷暗雀聲愁綠澈  
明層殿青山照近樓此時盛禮物顧省良若抽

攝官梁小廟

太祖太夫人廟也非嫡故別立廟侯景  
寇建邺詔以總權兼太常卿守小廟

疇昔遊依所今日薦櫻時憲章誠有草歲月遂難思故  
人獨之子官聯更在茲虛簷靜暮雀洞戶映光絲平生  
復能幾語事必傷悲

卜山楚廟

蘋藻祈明德倚棹息岩阿  
忽聽晨雞曙非復楚宮歌  
閒階薤宿薺古木斷懸蘿  
帷堂寂易晚桴鼓自相和  
盛祀流百世英威定幾何

山庭春日

一作休  
沐山庭

洗沐惟五日棲遲在

一作對

一丘古植橫近澗危石聳前

洲岸綠開河柳池紅照海榴  
野花寧待晦山蟲詎識秋  
人生復能幾夜燭非長游

七夕

六朝聲偶作  
柳顧言者非

漢曲天榆冷河邊月桂秋  
婉孌期今夕飄颻渡淺流  
輪

隨列宿動

一作轉

路逐彩雲浮  
橫波翻瀉淚  
束素反緘愁

此時機杼息獨向紅粧羞

南還尋草市宅

紅顏辭鞏洛白首入轅轅  
乘春行故里徐步采芳蓀  
逕毀悲求仲林殘憶巨源  
見桐猶識井看柳尚知門  
花落空難遍鶯啼靜易諠  
無人訪語默何處叙寒溫  
百年獨

如此傷心豈復論

和張記室源傷往

一作傷  
住人

小婦當壚夜夫婿凱歸年正歌千里曲翻入九重泉機  
中未斷素琴上本留絃空帳臨牕掩孤燈向壁然還悲  
寒隴曙松短未生烟

在陳旦解醒共哭顧舍人

一作傷  
顧野王

獨酌一樽酒高詠七哀詩何言萬里別非復竹林期  
堦荒鄭公草戶闕董生帷人隨暮

一作朝

槿落客共晚鶯悲

年髮兩如此傷心詎

一作獨

幾時

侍宴臨芳殿

六朝聲偶作柳顧言者非

鍾箭自

一作且

徘徊皇堂薦羽杯橋平疑水落石迴見山

開杯前暝色靜花處近香來西岷傷撫夕北閣濫游陪

侍宴瑤泉殿

水亭通粉詣石路接堂皇野花不識采旅竹本無行雀  
驚疑欲曙蟬噪似含涼何言金殿側亟奉瑤池觴

別袁昌州二首

河梁望隴頭分手路悠悠  
徂年若驚電別日欲成秋  
黃鵠飛飛遠青山去去愁  
不言雲雨散更似東西流  
客子歎途窮此別異西東  
關山嗟墜葉岐路憫征蓬  
別鶴聲聲遠愁雲處處同

經始興廣果寺題愷法師山房

息舟候香埠悵別在寒林  
竹近交枝亂山長絕逕深  
輕飛入定影落照有踈陰  
不見投雲狀空留折桂心

和衡陽殿下高樓看妓

起樓侵碧漢  
初日照紅妝  
絃心艷卓女  
曲誤動周郎  
並歌時轉黛  
息舞暫分香  
挂纓銀燭下  
莫笑玉釵長

賦得空閨怨

蕩妻怨獨守  
盧姬傷獨居  
瑟上調絃落  
機中織素餘  
自羞淚無燥  
翻覺夢成虛  
復嗟長信閣  
寂寂往來疎

并州羊腸坂

三春別帝鄉  
五月度羊腸  
本畏車輪折  
翻嗟馬骨傷  
驚風起朔雁  
落照盡胡桑  
關山定何許  
徒御慘悲涼



歲暮還宅

悒然想泉石，驅駕出城臺。  
翫竹春前筍，驚花雪後梅。  
青山殊可對，黃卷復時開。  
長繩豈繫日，濁酒傾一杯。

春夜山庭

春夜芳時晚，幽庭野氣深。  
山疑刻削意，樹接縱橫陰。  
戶對忘憂草，池驚旅浴禽。  
樽中良得性，物外知余心。

夏日還山庭

獨於幽棲地，山庭暗女蘿。  
澗清長低篠，池開半卷荷。  
野

花朝暝落盤根歲月多  
停樽無賞慰狎鳥自經過

賦得謁帝承明廬

霧開仁壽殿雲繞承明廬  
輪停紺憶引馬度紅塵餘香  
貂拜蔽袞花綬拂玄除  
謁帝升清漢何殊入紫虛

賦得攜手上河梁應詔

早秋天氣涼分手關山長  
雲愁數處黑木落幾枝黃  
鳥歸猶識路流去不知鄉  
秦川心斷絕何悟是河梁

賦得汎汎水中鳧

歸鳧沸卉同亂下芳塘中出沒時銜藻飛鳴忽颺風浮  
深或不息戲廣若乘空春鸚徒有賦還笑在金籠

賦得三五明月滿

三五兔輝成浮陰冷復輕隻輪非戰反團扇少歌聲雲  
前來往色水上動搖明况復高樓照何嗟攬不盈

衡州九日

秋日正淒淒茅茨復蕭瑟  
佳人薦初醞幼子問殘疾  
園菊抱黃華庭榴割珠實  
聊以著書情暫遣他鄉日

賦詠得琴

可憐嶧陽木，雕為綠綺琴。  
田文垂睫淚，卓女弄絃心。  
戲鶴聞應舞，游魚聽不沉。  
楚妃幸勿歎，此異丘中吟。

一作音

詠雙闕

象闕連馳道，天一作月宇照方疏。  
刻鳳棲清漢，圖龍入紫

虛。屢逢膏露灑，幾遇祥烟初。  
競言百尺麗，寧方萬丈餘。

三善殿夜望山燈

六朝聲偶作柳顧言者非

百花疑吐夜，四照似含春。  
的的連星出，亭亭向月新。  
採

珠非合浦贈珮異江濱若任扶桑路堪言並日輪  
奉和東宮經故妃舊殿

故殿看看冷空階步步悲猶憶窺牕處還如解佩時昔  
生無意早燕入有言遲若令歸就月照見不須疑

同庾信答林法師

藝文作周  
弘正非

客行七十歲歲暮遠徂征塞雲凝不解隴水凍無聲君  
看日遠近為忖長安城

詠李

嘉樹春風早春風  
花落新但見成蹊處  
幾得正冠人當  
知露井側復與天桃新

詠蟬

白露涼風吹朱明  
落照移鳴條噪林柳  
流響遍臺池  
聲如易得尋忽却難知

答王筠早朝守建陽門開

金兔猶懸魄銅龍欲啓扉  
三條息行火百雉照初暉  
御溝槐影出仙掌露光晞

闕

侍宴賦得起坐彈鳴琴

絲傳園客意曲奏楚妃情罕有知音者空勞流水聲

別永新侯

詩彙作張  
正見者非

送君張掖郡分悲函谷關欲知腸斷絕浮雲去不還

春日

水苔宜溜色山櫻助落暉浴鳥沉還戲飄花度不歸

於長安歸還揚州九月九日行薇山亭賦韻

心逐南雲逝形隨北雁來故鄉籬下菊今日幾花開

哭魯廣達

南史曰廣達陳之良將也至德二年為侍中  
中領軍賀若弼進軍鍾山廣達力戰及韓擒  
虎乘勝破宮城廣達被執入隋以  
憤慨卒江總撫柩慟哭題其棺曰

黃泉雖抱恨白日自留名悲君感義死不作負恩生

秋日新寵美人應令

以下  
七言

後宮唯聞莫瓊樹絕世復有宋容華皆自爭名進女弟  
定覺雙飛勝蕩家願並迎春比翼燕常作照日同心花  
聞道艷歌時易調忖許新恩那久要翠着未盡自生愁



玉臉含啼還似笑，角枕千嬌薦芬香。若使琴心一曲奏，  
幽蘭度曲不可終。陽臺夢裏自應通，秋樹相思一枝綠。  
為插賤妾兩鬟中。

新入姬人應令

洛浦流風漾淇水，秦樓初日度陽臺。玉軼輕輪五香散，  
金燈夜火百花開。非是妖姬度江日，定言神女隔河來。  
來時向月別姮娥，別時清吹悲蕭史。數錢拾翠爭佳麗，  
拂紅點黛何相似。本持纖腰惑楚宮，暫迴舞袖驚吳市。

新人羽帳挂流蘇  
故人網戶織蜘蛛  
梅花柳色春難遍  
情來春去在須臾  
不用庭中賦綠草  
但願思著弄明珠

內殿賦新詩

兔影脈脈照金鋪  
虬水滴滴瀉玉壺  
綺翼雕甍邇清漢

虹梁紫

一作桂

柱麗黃圖風高暗  
綠凋殘柳雨駛芳  
紅濕


晚笑三五二八佳  
年少百萬千金買  
歌笑徧著故人織  
素詩願奏秦聲采  
蓮調織女今夕渡  
銀河當見新秋停

玉梭





漢魏六朝百三家集卷一百五



總校官庶吉士 臣侍 朝

校對官中書 臣張 塤

謄錄貢士 臣黃永澄

謄錄舉人 臣汪志伊